

Segun minister Ursell Arends, nombramentonan pa Raad voor Ouderen no a tuma luga ainda



Den nos edicion di ayera nos a publica un articulo tocante un entrevista cu Bon Dia Aruba a realiza cu presidente di Organizacion di Pensionado Publico di Aruba (OPPA), Sr. Ivo Valdes, den cual el a trece dilanti su malcontento y alabes a cuestiona e anuncio di gobierno di e realisacion di Raad voor Ouderen.

Valdes a indica cu OPPA no tabata sa di e realisacion di e Raad voor Ouderen y tampoco no ta na altura di ken

ta forma parti di e raad aki, locual el a remarca ta “un falta di respet pa nos organizacion.”

El a señala tambe cu e potret cu minister demisionario di Asuntonan di Adulto Mayor, Ursell Arends, a publica hunto cu e anuncio di e realisacion di Raad voor Ouderen ta un potret bieu.

El a indica cu el haya “straño” cu a usa e potret ey pasobra ta haci “como si fuera cu e hendenan ey ta e integrantenan di Raad voor Ouderen, pero esey no ta berdad.”



Reportero di Bon Dia Aruba a tuma contacto cu minister Ursell Arends pa puntra si en berdad e no a tuma contacto cu OPPA pa loke ta e proceso di realisacion di Raad voor Ouderen, si e organizacion, como representantenan di un gran parti di adultonan mayor, no lo mester forma parti di e raad, ken ta forma parti di e raad y si ta corecto cu e potret cu a ser publica cu e anuncio di e Raad voor Ouderen ta un potret bieu.

Den su contesta minister Arends a clarifica cu e comuni-

cado di prensa a indica cu e RAVO (Raad voor Ouderen) a ser realiza, no instala y pues e nombramentonan no a tuma luga ainda. El a sigui splica cu e nombramentonan ta pasa door di Bureau Secretariele Ondersteuning SER en Additionele Raden (BOSSAAR) cu lo propone candidatonan a base di e perfil nan cu tin y cu a wordo proponi door di e Technische Commissie.

E mandatario a señala cu den e comunicado tambe a splica cu e logro aki ta uno cu a tuma su tempo debi cu e re-

organizacion di e secretariado di Sociaal Economische Raad mester a tuma luga, cual tabata un proceso administrativo largo.

Por ultimo minister Arends a indica cu el a instala e comision ‘Ouderenzorg in Perspectief’ cu a sa di fungi como antesala di e RAVO, y asina duna conseho riba e temanan di suma importancia den cuido di adultonan mayor. Esaki ta e potret cu a ser usa den cual Sr. Valdes aparece ya cu e tabata forma parti di e comision aki.

Chauffeur responsable di accidente fatal finalmente a entrega su mes na polis



Algun dia despues di e accidente fatal cu a cobra bida di un persona diadomingo marduga, segun informacion oficial publica pa Cuerpo Policial di Aruba, finalmente e chauffeur responsable a entrega su mes na polis.

Diadomingo den oranan di marduga a bira conoci e noticia di un accidente fatal cu a cobra bida di un persona femenino di 35 aña di edad cu

tabata coriendo riba un e-bike (step). Despues cu e accidente a sucede e chauffeur cu a ocasiona esaki a simplemente bandona e sitio sin para pa brinda ningun asistencia na e victima.

Dialuna un auto a ser haya kima na Wela, cual a bati alarma pa autoridadnan. A resulta di ta un auto marca Honda Fit cu posiblemente ta relaciona na e accidente. Despues di e reportahe aki,

diamars merdia varios medio di comunicacion local a informa tocante e detencion di un muhe na Primavera cu tambe posiblemente lo ta relaciona cu e accidente fatal aki.

Algun ora despues autoridadnan a laga e persona aki den libertad. Segun informacion cu a circula, e muhe a logra demostra cu e no tabata e chauffeur di e auto y cu en realidad el a bende e auto na otro persona.

Alto Comisario di polis, Ramon Arnhem, a pidi e chauffeur cu a causa accidente fatal pa entrega su mes. Mediante un declaracion dialuna ultimo e alto comisario a sigura cu “esaki ta inaceptabel” caminda e chauffeur no a para ni a brinda ayudo na e victima y a bandona e sitio.

Diaranson anochi KPA a informa a traves di un publicacion oficial cu den oranan di anochi e chauffeur responsable cu a ocasiona e accidente fatal diadomingo marduga y cu a bandona e sitio a entrega su mes.

E publicacion oficial ta bisa lo siguiente:

“Diaranson den oranan di anochi e homber J.J.R.D. naci na Venezuela di 44 aña a presenta na warda di Balashi compaña pa su abogado en conexion cu e accidente fatal cu a tuma lugar diadomingo marduga. Na warda di Balashi e la keda deteni pa cu e investigacion di e caso fatal aki.”

No tin mas detaye conoci tocante e caso aki. Bon Dia Aruba lo keda pendiente pa e desaroyo di loke ta e investigacion di e caso lamentabel aki pa informa comunidad di Aruba.

